



Informe di prensa 2018-042

## Atrobe a entregá plaka di papel i moneda falsu na CBCS

Willemstad/Philipsburg – Atrobe a entregá na CBCS biyetenan di 100 florin i tambe monedanan di 5 florin falsu poné den sirkulashon. E biaha aki e biyetenan ta di masha bon kalidat i ta difísil pa diferensia for di biyetenan legal.

E biyetenan falsu entregá na Banko tin e siguiente karakteristikanan:

- e marka di awa (watermerk), loke generalmente bo por mira solamente ora bo tene e biyete kontra di lus, ta direktamente visibel riba e biyetenan di banko falsu;
- e firmanan riba e biyete ta vago i un ku tiki umedat bo por kita nan for di e biyete;
- e biyetenan ku tur probabilidad ta kopianan di biyetenan legal, pero mal kòrtá. Bo ta mira un rant blanku na e parti abou di e biyetenan.
- bo no por lesa bon e palabranan “auteursrecht Bank van de Nederlandse Antillen” parti patras di e biyete: ta falta lèter den e palabranan “auteursrecht” i “bank”
- e numbernan di seri detektá riba e biyetenan ta:
  - 8255939013
  - 8255959785
  - 8255401400
  - 8253551472

E monedanan di 5 florin falsu ta monedanan di añanan 1998 i 1999. E monedanan falsu aki ta algu mas chikitu, òf algu mas grandi ku e moneda real. E diferensia di tamaño no ta bon kla na promé bista. Un dje karakteristikanan di outentisidat di e monedanan di 5 florin (esaki ta kaso tambe ku e moneda di un florin) ta ku nan ta magnétiko. Esaki ta nifiká ku nan ta keda pegá na un magnet. Serka monedanan falsu esaki no ta e kaso. Tambe e moneda falsu ta zona otro kompará ku ora bo laga un moneda legal kai. (e zonido di un moneda legal ta algu mas pisá).

Banko a komprondé di algu banko komersial ku nan a risibí tambe biyetenan di 50 i 25 florin falsu. Nan a entregá esakinan na polis. CBCS i polis ta traha estrechamente den kaso aki.

CBCS kier alertá públiko un baha mas pa paga bon tinu na momentu ku ta aseptá plakanan di papel. Akaso bo tin duda pa loke ta trata un biyete, ta konsehá bo pa nenga e biyete.

Kisas ta dimas pa CBCS kòrda bo ku no ta permití pa ningun persona i/òf instansia pa aseptá biyetenan di banko falsu. Ta konsehá bo pa tuma kontakto inmediateamente ku polis na momentu ku bo ta sospechá ku bo tin di aber ku biyete di banko falsu. Ta kastigá falsifikashon di plaka òf pagamentu konsientemente ku plaka falsu ku un kastigu di prizòn máksimo di nuebe aña.

Pa e karakteristikanan di outensidat di biyetenan di banko, nos ta referí bo na nos wèpsait: <http://www.centralbank.cw/banknotes>.

Field Code Changed

Willemstad, 5 di òktober 2018  
CENTRALE BANK VAN CURAÇAO EN SINT MAARTEN